

Emekin programa ezagutzera emango da ekainaren 16an. Somos Asesoreseko Jaione Morenok emango du hitzaldia, aholkulari horiek izango baitute emakume ekintzaileei laguntzeko ardura. Emakume ekintzaileen ideiak sustatzeko proiektua da Emekin.

JAIONE MORENO (Somos Asesores):

"Emakume ekintzaileak behar dira gaur egun"

- Zer da Emekin?


Emakumeek gero eta protagonismo haundiagoa dute enpresa-munduan, eahalegin handia egin dutelako horrela izateko, baina oraindik hainbat oztopo aurkitzen dituzte bidean. Gizonen eta emakumeen artean zatiketa dago oraindik, tradizionalki lan-merkatua gizonentzako izan delako eta etxeko-lanak emakumeentzako. Horrela, Diputazioa, Caja Laboral eta AS-PEGI erakundeak ondorio batera iritsi dira, Europar Batasuneko lerroak jarraituz, emakumeen artean ekintzailetasuna bultzatzeko. Hori da Emekin, emakumeen artean enpleguaren sorrera sustatzeko helburua duen programa.

- Noiztik dago martxan?

2007an jarri zen martxan eta lehen saioa 2013ra arte egongo da. Irten dira hainbat proiektu, batez ere Donostialdean, izan ere, hemen beste antzeko proiektu bat zegoen martxan, emakume eta gizonentzako elkarlanean zuzenduta zegoena.

- Zergatik da emakumeentzako espreski programa hau?

Emakumeen beti izan dute arazo gehiago lan-merkatuan eta enpresa-munduan sartzeko. Euren profilari, emakumeen enpresen profilari, eta testuinguru soziokultural eta ekonomikoari atxikitutako arazoak dira horiek. Hala ere, gaitasun handiko emakume asko dago eta ez da euren gaitasun hori aprobetxatzen. Emakume ekintzaileak oso beharrezkoak dira, ez da gizonengana mugatu behar, hobe da herritar guztiak hartzea. Gainera, hainbat txostenek esaten dutenez, gizonak sortutako enpresak lehenago 'hiltzen' dira emakumezkoenak baino.



- Zer egin behar du emakume batek programa erabiltzeko?

ASPEGIra edo gugana etorri behar da lehenik bere ideia kontatzeko. Ondoren, ekintzailea izateko trebetasunak garatzeko tailerrak jasoko dituzte eta bideragarritasun plana egingo diogu. Ondoren, enpresa aurrera eramanez gero jarraipena eta tutoretza egingo diogu urte batez. Dena doan. Guk Debarrenako zerbitzua eskainiko dugu, izan ere, 20 entitate homologatu gaude eta zerbitzu hau eskaini ahal izango dugu gure bailaran.

- Proiektua jakitera emateko hiltzaldia eskainiko duzue.

Hilaren 16an hitzaldi-informatiboa eskainiko dugu Portalean. Emekin zer den jakitera emango dugu, baina proiektu horrez gain dauden antzeko proiektuen berri ere emango dugu jakitera, tristeia izango litzatekeelako beste laguntzak ez aprobetxatzea.

- Jendea animatu da Eibarraren?

Oraindik ez da jakitera eman, baina lehengoan Emakumearen Mahaikoekin elkartu ginen eta jarrera positiboa aurkeztu zuten. Zerbaite egiteko asmoa zuen jendea ikusi genuen.



EH Sukarrak hilaren 18an joko du Untzagan, Reno Renardo taldearekin.


Sanjuanak, datorren asteburutik aurrera

EGUATZEN EGUERDIAN AURKEZTU ZUTEN AURTENGO SANJUANETAKO PROGRAMAZIOA UDALETXEAN.

Jabier Zorrakin Jai Batzordeburuak egindako aurkezpenean aldamenean izan dituen M^a Jose Telleria, Jose Luis González "Poxpolo" eta Jone Telleria Jai Batzordeko kideak. Aurtengo programa osatzeko 150.000 euro erabili dituzte eta, azken urtetako martxari jarraituz, San Juan egunaren aurretik hasiko dira jaien inguruan antolatutako ekitaldiak eta horietako asko ekainaren 18ko asteburuan pila-tu dituzte. Egun horretan arratsaldetik egongo da zer ikusi, 19.30- etatik aurrera Dantzari Eguna ospatuko baita Untzagan, Klub Deportiboaren eta Kezka Dantza Taldearen eskutik. Horrez gain, Eibarko Balleteko dantzariak ikasturte amaierako ikuskizuna eskainiko dute Coliseoan. Eta gauean, Astele-na frontoiak boxeo gaua hartuko du, besteak beste hainbat borro-kaldi eta Sanda profesional erakustaldia eskainita. Eta Untzagan, berriz, EH Sukarra taldeak bere sorreraren 20. urteurrena ospatzeko kontzertu berezia eskainiko du, Reno Renardo taldea hasierako talde gonbidatu izango duen emanaldian.

Euskal Jaialdia hilaren 20an

Hurrengo egunean, goizean zein arratsaldean Sanjuanetako hainbat kirol norgehiagoka jokatuko dira. Iluntzean, Txalo Kon-



painiak "Trampa mortal" antzez-lana taularatuko du Coliseoan, emanaldi bikoitzean eta gauean berriz ere musika izango da protagonista, Doctor Deseo taldeak Untzagan emango duen kontzertuarekin. Taldearen kontzertua amaitzean, berriz, Arno DJ-k jarraituko du gaua girotzen. Eta domekan goizean goizetik hasiko dira ekitaldiak, 07.30etan Elgoibarko Dultzaineroek zezen-plazaraino gidatuko duten kalejirarekin. Jarraian, Marqués de Sakako bigantxekin enbolatuak egingo dira. Squash txapelketa goizetik jokatuko da, Ipurua kiroldegian eta Ipurua Gimnasia Erritmiko taldearen erakustaldia, berriz, eguerdian hasiko da Untzagan. Eta arratsalderako, errekortadoreen jaialdia egingo da zezen-plazan, Untzagan herri kirolak izango dira protagonista ...eta kitto! Euskara Elkartek antolatutako Euskal Jaialdian eta Lacasiun emakume latinamerikarren taldearen eskutik dantza ikuskizuna egingo da. Eta hori guztia hasiera baino ez da, ondoren datozen egunak bete-beteak etorriko zaizkigulako. Beraz, hasi motorrak berotzen.